



Inatsisartunut ilaasortaq
Sara Olsvig

Apeqqut nr. 250-imut akissut

Asasara Sara Olsvig

Inatsisartut suleriaasissaanni § 37 naapertorlugu Naalakkersuisunut apeqqutinik ukuninnga saqqummiussaqaqputit.

20. december 2013

Postboks 1601

3900 Nuuk

Tlf. (+299) 34 50 00

Fax (+299) 32 56 00

E-mail: isiin@nanoq.gl

www.nanoq.gl

Apeqqutit:

- 1. Greenland Minerals and Energy Ltd.-ip tunngaviliisua, siornatigut piginnittuusimasut massakkulluunniit piginnittuusut Australiami pinerlunniaqatigiinnut atassuteqartuunersut aammalu Somaliami, uuliasiornermi aatsitassarsiornermilu pilersaarusiarmut allamut tunngatillugu, pinerliiniaqatigiinnut aningaasalersuisuusarsimanersut Naalakkersuisut uppernarunnaarsis-sinnaavat imaluunniit uppernarsarsinnaavaat?*
- 2. Greenland Minerals and Energy Ltd. (GMEL)-imik siornatigut qularnangitsumik piginneqataasuusimasut massakkulluunniit piginneqataasuusut Australiami pinerlunniaqatigiinnut atassuteqartuunersut Somaliamilu, aatsitassarsiornermi uuliasiornermilu pilersaarusiarmut allamut tunngatillugu, pinerliiniaqatigiinnut aningaasalersuisuusarsimanersut Naalakkersuisut uppernarunnaarsis-sinnaanngikkunikku taava pinerluttuliornermut pinerliiniartuliornermullu tassunga attuumassuteqarnerup pissusia annertussusialu pillugit Naalakkersuisut qanimut misissuataarisitserusussinnaappat?*
- 3. Greenland Minerals and Energy Ltd. (GMEL)-imik siornatigut qularnangitsumik piginneqataasuusimasut massakkulluunniit piginneqataasuusut pinerlunniaqatigiinnut atassuteqartut Somaliamilu pinerliiniaqatigiinnut aningaasalersuisuusut Naalakkersuisut uppernarsarsinnaassagunikkut Kuannersuarni, naliliinerit ilaat naapertorlugit nunarsuarmi uranisiorfiit annersaasa pingajorilerumaagassaanni, GMEL uranimik piiaanissamut akuersissummik tunineqassappat taava Naalakkersuisut isumaat malillugu tamanna Kalaallit Nunaannut sillimaniarnermut politikkikkut ajornartorsiutaalissava?*
- 4. Greenland Minerals and Energy Ltd. (GMEL) Kuannersuarni uranimik piiaanissamut akuersissummik tunineqassappat tamanna Kalaallit Nunaannut sillimaniarnermut politikkikkut ajornartorsiutaalersussatut Naalakkersuisut isumaqarfigissagunikku taava Naalakkersuisut qanoq iliuuseqassappat?*

Kinguliinisut tunngavilersuuteqarlutit:

Australiami tusagassiuutit assigiinngitsut Greenland Minerals and Energy Ltd. (GMEL) Narsap eqqaani Kuannersuarni ujaasinissamut akuersissummik pigisaqartoq ukiuni tullerriaanni sammisarismavaat. Ilaatigut GMEL-ip tunngaviliisua, siornatigut piginneqataassutit amerlanersaannik piginnittuusimasoq massakkullu qularnanngitsumik piginneqataassutit amerlanersaannik piginnittuusooq, ukiorpasuarni australiamiumut pinerlunniaqatigiinnut atassuteqartuusimasoq, aqqit assigiinngitsut ikinnerpaamik qulingiluat atorlugit nunarsuarmi tamarmi aktianik allasimasunik ingerlatseqatigiiffinnillu piginnittuusooq aammalu aalajangersimasumik attaveqarfissatut niuerfittullu najugaqanngitsoq amerlasuutigut allaatigineqartarpoq. Australiami tusagassiuutit aamma uppersarsarnikuuaat inuinnaat akornanni eqqartuussiveqarnikkut aqqiagiinngissutini Italiamiut-Australiamut mafiaanni inummik qitiusumik inissisimaffilimmik isumaqatigiissaarisumik arlaleriarluni atuisarsimasoq. Halvfemsikkunngooq ikiaroorartunik isertortukkut eqqussuisartutut pinerlunnikkullu aningaasarsianik malunnarunnaarsaassartutut unnerluutigineqartarsimagaluarpoq.

Isumaliutersuut aviisimi ullormut saqqummersartumi Informationimi novemberip 28-ani 2013 saqqummersooq (<http://www.information.dk/480186>) aammalu oqaatsit marluk atorlugit isumaliutersuut Atuagagdliutini, AG-mi, nr. 49-mi decemberip sisamaani 2013 saqqummersooq suliamut matumunnga tunngasut matumuuna unnersuussutigineqarput.

Akissutit:

Naalakkersuisut Australiami allaaserisat ukiuni 2009-miit 2011-mut allanneqarsimasut taamatullu tusagassiortup Martin Breumip tamakkuninnga allaaserisaa misisorpaat, taassuma tusagassiarineqartut tamaasa issuaavigimmagit, kaammattuutigalugu nalinginnaasumik isornartorsiuerpalaartumik atuarneqassasut nammineerlunilu eqqarsaatersuutigalugit

(<http://www.martinbreum.dk/Filer/File/Aviser/Andre/H%C3%A5rd%20kritik%20af%20GME%20i%20australsk%20presse.pdf>).

Allaaserisammi pineqartut taamaassorinninnernik eqqarsaatersuutinillu pingaartumik tunngaveqarput, erseqqinnerusumik uppersarsaasersugaanngitsunik, soorluttaaq allaaserisaaq innersuussutigineqartoq taamatuttaaq uppersarsaasersugaanani taamaallaalli inunnik aqqisigut taaneqanngitsunik eqqartuiffiulluni.

Naalakkersuisut Greenland Mining og Energy Ltd-ip (GMEL) piginnittui pillugit paasissutissanik pissarsiniarput, oqaatigineqassallunilu ingerlatseqatigiiffimmik aningaasanik niuerfimmi nalunaarsugaasumik piginnittuuneq malittarisassat aningaasanik niuerfimmuut pineqartumut nunamullu aningaasanik niuerfiup inissisimaffigisaanut atuuttut tunngavigalugit aktianik killilersugaanngitsumik akornusersugaanngitsumillu pisisarnermik tunisisarnermillu tunngaveqarmat. Paasissutissani tiguneqartuni atuarneqarsinnaavoq GMEL ulloq 28. November 2013-imi 3.677-init ikinnerunngitsunik piginnittoqartoq, taakkunanga 3.451-it Australiami pingaarnertut najugaqarfeqarlutik. Piginnittunut ilaagipput aningaasalersuisartut peqatigiiffii, aningaaseriviit soraarnerussutisiallillu ingerlatseqatigiiffii. Taamaammat piginnittut pineqartut ingerlatseqatigiiffinnit aningaasanik niuerfinni nalunaarsugaasunit allanit allaanerussasutut isumaqarfiginanngillat.

Oqaatigineqassaartaaq ingerlatseqatigiiffimmi aktianik pigisaqarnissaq inatsisinik unioqqutitsinerunngimmat, ingerlatseqatigiiffiullu aningaasanik niuerfimmi nalunaarsugaasup aalajangersinnaanngimagu kikkut aningaasanik niuerfimmi pisisasannersut. Aktiaatillit aktiaatilittut inissisimanermik avataatigut iliuuseriunnagaat inatsilerinermut tunngatillugu sunniuteqarnaviangillat, ingerlatseqatigiiffimmi nammineerlutik inatsilerinermut tunngatillugu ingerlasuummata.

1-imut)

Siuliini atuarneqarsinnaasutut GMEL ulloq 28. november 2013 3.677-inik aktiatigut piginnittoqarpoq, taamaammatt Naalakkersuisunut taakku ilaasa ataasiakkaat pissutsinut taaneqartunut peqataasimasinnaanerat uppersarsassallugu ajornarlunnarpoq. Taamatuttaaq Naalakkersuisut Australiami oqartussaasut imaluunniit GMEL-ip aktiaataasa nalunaarsorsimaffiata tassunga atatillugu eqqartuussivilersuussimasinnaanerat ilisimasaqarfiginngilaat.

2-mut)

Taamaassorinninnerit Kalaallit Nunaata killeqarfiata avataaniipput. Naalakkersuisut paasissutissanik GMEL-ip imaluunniit Greenland Mining and Energy A/S-ip kalaallit nunalluunniit tamalaat inatsisaannik unioqqutitsisimassanerannut takussutissanik tigusaqanngillat, piginnittut erseqqinnerusumik misissuiffigineqarnissaannut Naalakkersuisut suliareriigaanniit allaanerusunik pissutissaqalersitsisunik. Aktiaatillit ataasiakkaat ingerlatseqatigiiffiup ulluinnarni ingerlanneqarnera sunniuteqarfigisanngilaat, iliuusserineqarsimajunnartullu tamakku ingerlatseqatigiiffiup susasaqarfiginngisai ingerlatseqatigiiffiup akisussaaqataalerneranik kinguneqarsinnaanngillat. Taamaaliorneq ingerlatseqatigiiffinnut inatsisitigut malittarisassanut akerliussaaq.


3-mut)

Naalakkersuisut taaneqareersutut GMEL-imi aktiaatillit attaveqarneragaanerat taamaannerarlugu taamaannginnerarluguluunniit uppersarsarsinnaanngilaat. Peqatigitillugu ilisimatitsissutigineqassaaq GMEL misissueqqaarnissamut akuersissuteqarfigineqarsimannngimmat, paaanissaminulluunniit akuersissuteqarfigalugu nalunaarfigineqarsinnaassanngimmat. Greenland Mining and Energy A/S taannaavoq nunami nertami pineqartumi misissueqqaarnissamut akuersissuteqarfigineqarsimasooq, malittarisassallu atuuttut malillugit periarfissaqarluni paaalerniarluni qinnuteqarnissamut taamaaliornermut malittarisassat atuuttut naapertorlugit.

4-mut)

Aallaqqaataani oqaatigineqarpoq GMEL misissueqqissaarnissamut akuersissuteqarfigineqanngimmat. Soorluttaaq Naalakkersuisut Greenland Mining and Energy A/S-imit misissueqqissaarnerniit paaanermut nuunnissamik qinnuteqaammik tigusaqanngitsut. Taamaaliornissamik qinnuteqaateqartoqarsinnaaneranut tunngatillugu soorunalimi sillimaniarnermut tunngatillugu naalakkersuinerumut tunngasortai nalilersorneqassapput. Aatsitassanillu qinngulanertalinnik paaanissamut akuersissuteqartoqassappat tassani tuniniaanermut allanullu aalajangersimasunik atugasaqartitsisoqassaaq, nunani tamalaani isumaqatigiissutit malillugit.

Inussiarnersumik inuulluaqqusilluta


Jens-Erik Kirkegaard